

四庫全書

史部

欽定四庫全書

史部

欽定大清會典則例卷四十三

詳校官檢討臣劉炘

編修臣程嘉謨覆勘

總校官原任中允臣王燕緒

校對官助教臣黃昌祺

謄錄監生臣胡觀瀾

欽定四庫全書

欽定大清會典則例卷四十三

戶部

漕運三

一計屯貼運直隸通州天津各所屯地每軍分給五十畝其通州所原存地畝未足者將天津門地撥補○山東德州衛屯地每軍均分四項七畝七分有奇輪流耕種每歲除納正項錢糧

外每畝公出銀二分一毫津貼運軍德州左衛
撥德州衛屯地五百七十一頃三十二畝有奇
給軍貼運其地仍歸德州衛承種每畝除正項
錢糧外津貼左衛運軍銀二分七釐濟寧衛每
船分給贍運田五頃四十畝任城衛每軍額徵
起科地七十六畝有奇輪流承種濟運東平所
每船給地五頃自為開墾以作贍運免其起科
平山衛每船分給贍運地二頃四十五畝不等

東昌衛每船分給贍運地五項臨清衛每軍原贍地五十畝或二三十畝不等皆分派濟運又德州所屯地按軍分給錢糧不徵不解坐抵安家月糧之用每船該地四項五畝有奇濮鄆等州縣每船給地三項贍運○江南江安糧道所屬江寧等衛原編屯丁運戶兩項其屯地照畝納糧額供兵餉運軍給以行月錢糧不給屯田安慶衛每軍授田五百二十餘畝分為上下兩

運新安衛屯田額徵銀五千一百十有六兩二錢四分有奇勻分給軍凡幫貼散戶不論軍民管佃每年每畝津贍銀一錢宣州衛每船分田千四百二十二畝有奇歲津運銀一百四十兩有奇續又每畝加津貼銀三分建陽衛每軍舊給額田四十畝今以實在田數分別等次均勻盡分無分屯軍運戶按船授田輪流領運廬鳳淮徐等衛屯田均繫分別等次品搭均勻給軍

贍運其民種軍田者按畝津貼蘇松糧道所屬
蘇松等衛所屯田分上中下三等各照領運船
分別給軍○浙江各衛所屯田每船均給百有
二畝八分六釐有奇計屯起運凡有屯領運衛
所即以原額田津派本衛所應運之船具分剩
屯田分別等次津貼有衛無屯衛所按船分給
至有屯無運衛所田畝徵租解道照則貼派無
屯衛所之軍○江西各衛所屯田照各衛原額

漕船及屯軍數目均勻分撥每船編撥屯田六百二十九畝募佃耕種令佃戶完糧之外每畝每年運軍收租銀八分其民墾成熟轉售賣者除完正課外照民田則例按畝折徵解道津貼本衛所運軍其有減存之船將該船應得屯田地畝租息除完糧外所餘籽粒折價歸公○湖北湖南各衛所屯田按畝科糧給軍其運弁俸薪等項並軍三小料及運軍安家糧銀均於屯

田內照數徵解支給○乾隆二年奏準各省屯田如有佃種不清者自應一并清理但民間相沿日久必須辦理妥協方無煩擾應令總漕各該省督撫酌量辦理○又題準湖南長沙等三十七州縣統計閒丁一千八百九十五名每丁徵銀二錢共徵丁銀三百七十九兩因各丁內有無產窮丁無力完納議令照依人丁匠班之例攤入各州縣地糧徵收○三年

諭朕思惠養斯民之道以輕徭薄賦為先凡各省田糧稍有偏重之處悉已陸續豁免以紓民力今安徽所屬懷遠衛軍田十三頃每畝徵銀八分八釐有奇較之民田未免稍重著照蒙城縣民田之例每畝徵銀二分一釐有奇共免銀九十八兩八錢七分又武平衛軍田五千二百九十一頃每畝加徵銀七釐三毫有奇除見在請禁衛田之私典等事案內每畝應留贍運銀一釐七毫外每畝著減

去加徵銀五釐五毫有奇共免銀二千九百六十
二兩六錢五分該部即遵諭行文該督撫自乾隆
三年為始永著為例欽此○五年奏準屯田租與
民人耕種該運軍止許得當年租銀如加別年
租銀立券私交者照私典軍田例與受皆行治
罪其田追入新運之軍租價入官○又題準浙
江温州衛屯田三萬一千二百三十四畝內撥
派本衛二幫田萬六千二百九十三畝該衛各

軍均交親屬管收外其餘田萬四千九百四十畝我派寧紹處三衛之軍從前原因相隔遙遠未經執業未幾又值兵燹屯民墾熟為業以致軍民爭訟今議定按照上田一畝收穀三石中田二石下田一石六斗各半平分之數輸津給軍其佃戶輸津完餉之處令該衛徵比該管府道催徵分別解餉給軍衛備徵解不全照例叅處佃戶不能完納別召良佃耕種私自典賣者

治罪○又題準各省屯田徹底清釐將實在數目造具清冊送部倘不實力奉行該督撫一并題叅○八年題準湖北武昌等衛所屯田清出原額有屯清屯無屯清費每年德安所額船三十三號每船得幫銀百六十二兩襄陽衛三十船每船給銀百七十兩武昌衛五十六船武左衛五十五船每船得銀一百四十七兩三錢黃州衛二十六船每船給銀一百二十五兩蘄州

衛三十二船每船給銀一百三十五兩各有奇

○又題準湖北荊左衛成熟並新墾升科屯田

二千二百五十五頃八十五畝有奇荊右衛成

熟運操屯田二千二百二十五頃三十二畝有

奇沔陽衛屯田千九十六頃三十畝有奇又軍

操田八十四頃有奇荊州左右中前後五所屯

田六百十有二頃十有四畝操田千三百十有

五頃五十八畝各有奇應令運軍民佃照糧一

例分派凡軍田典賣在民及頂絕墾荒年久造
有房屋墳墓願當軍差者即將本人編入軍戶
當差軍置軍產田差均去者亦準其當差管業
其田不準回贖如民買軍田不願當差及軍買
軍產田去差存而原戶貧乏不能回贖者分別
津貼以贍漕運○九年題準江西屯田清出原
額新增田地基山塘堰除豁除坍塌外見在成
熟者五千三百三十七頃七十八畝有奇內南

昌前左撫州鉛山饒州等衛所隨田地基山塘
堰並建德縣補軍屯田鉛山所運軍隱匿入官
屯田袁州屯田塘五百七十六頃六十畝不徵
餘租九江廣信鉛山等衛所成熟屯田二十四
百二十七頃七十五畝有奇應徵餘租軍丁利
於自取贍運外其南昌等衛所軍民管業屯田
二千三百三十三頃四十二畝有奇每畝派徵
餘租不等每年徵租銀九千五百九兩有奇吉

安所坐落龍泉縣丈出餘屯改升民田六十一畝每年徵租穀折價銀四十兩九分有奇均由縣徵收解道轉給各衛所運軍勻分濟運○十年題準山東衛所屯田除東昌濮州東平三衛所並無什軍分種均繫見運之軍執業外其濟寧臨清平山三衛所地畝什軍一例領地一軍駕運九軍津貼臨清衛貼運山東前幫河南前後兩幫每年每畝津銀三分濟寧衛貼運濟寧

前後兩幫按地定肥瘠照收成分數折給東昌
衛之平山前後兩幫每年每畝津銀八分其典
賣地畝逐漸贖回歸輪運之軍亦令同贖田租
輪收嗣後若再典賣與受一并治罪追田給運
典賣地內葬有墳墓者酌給畝數永行津貼什
軍應贖地畝未贖之前應令一例津運各幫永
減船及閒運軍田內有糧地畝每年每畝津銀
八分以二分完糧六分津運每歲津銀令各衛

彙齊按原減原歇幫次勻給見運各軍久荒屯
田軍民費本開墾者給照執業議津每年每畝
津銀六分以二分完糧四分津運○又題準浙
江屯田除康熙二十五年裁減駕軍田畝外按
各衛所出運千四百四十一船每船給田百有
二畝八分六釐有奇運軍有自能執業者即令
運軍完納收租有因坐落遙遠以及零星磽瘠
不能自執業者歸屯佃管辦即令屯佃完餉輸

津贍運其津銀數目照依地土隨時酌定令衛所印官徵解給軍○又題準德州正左二衛贍運屯田坐落直隸山東二省從前原繫軍民承種貼租各軍自討襄運或有或無有名無實今清出地二千四百二十九頃有奇每年每畝以一分起租共銀二千四百二十九兩有奇分給運軍五十六名每名年給銀十兩什軍五百四名每名年給銀三兩七錢有奇如隸本衛者由

衛徵租如隸直隸者每年造冊咨直督轉飭州縣代徵闕解衛備一例分給各丁承領任城幫四十七船並無額產仍照向例每船每年給贍軍銀十兩於地丁內動給彙入漕項奏銷○十二年題準各省贍運屯田典賣與民照例備價回贖由衛所移明州縣飭令民人收價退田倘地方官不即飭退即將該州縣照承辦遲延例叅處如該軍不即備價妄控退田以及一時草

率不行詳察旋即更正者將該衛所官弁罰俸
一年若實繫民田故作軍田捏報詐冒者將該
衛所官升降一級調用倘各衙門書識人等有
隱占屯田情弊該管官弁皆照失察衙役犯贓
例議處該役照侵盜官糧例治罪○十三年題
準湖北荆右沔陽三衛有貧乏赤丁按照原派
輸幫銀數減免幫貼其枝彝長遠四所既隸荆
州衛其舊存成熟田地千二百頃十畝有奇改

照民田起科雖非運產究屬同衛運軍亦令津貼以重漕運

一優卹運軍康熙二十年議準漕船凍阻將通濟庫銀借給仍令總漕將應給漕贈銀照數扣解補還原項○三十五年題準江淮興武二衛漕船凍阻不能回南動支通濟庫銀每船給銀二十兩速催回次仍令總漕於漕贈銀內扣解還款○四十六年議準各省領運運軍限內過

淮抵通照數全完者令總漕賞給花紅以示鼓勵如抵通交糧於額糧之外有領運三年陸續多交米至百石者倉場咨部注册領運六年多交米至二百石者給以九品頂帶榮身如有運軍運米至二十年雖無多交之米並無挂欠及過犯事故者倉場侍郎咨部亦給以九品頂帶榮身○六十年議準漕船回空凍阻暫動東省藩庫銀每船借給八兩於六十一年各該糧道

應給運軍月糧內坐扣移解東省還項○又議
準到淮各幫漕船因雇募民船諸費浩繁借給
河庫帑銀作民船口糧水脚之用江安漕船每
船借銀五十兩蘇松漕白船每船借銀四十兩
江西漕船每船借銀三十兩浙江漕白船每船
借銀五十兩均於次年運軍應領行月銀米內
扣還○雍正元年議準各省完糧各軍並守凍
完糧軍船每船正軍一名賞給銀二兩又山東

張秋臨清一帶地方浙江江西江南等省幫船
運軍頭舵工等守凍不能回次量支藩庫銀四
千兩每船給銀六兩○六年奏準回空漕船過
淮安關頭工舵工水手人等零星稍帶梨棗六
十石以下者免其報稅其餘貨物仍照例籤量
按貨納稅經許墅關稍帶梨棗及應上稅之物
仍令輸稅○七年

諭運軍駕運辛苦若就糧艘之便順帶貨物至京貿易

以獲利益亦情理可行之事著於舊例六十石之外
加增四十石永著為例欽此○八年題準各船頭工
舵工二人每人準帶土宜三石水手無論人數
每船帶土宜二十石合算每船準帶土宜共百
二十六石○九年議準河東二省截留存荆漕
米三十萬石議令原船運通挽輸上下倍為勞
苦按道里之遠近時日之多寡酌議在德州往
返者每船給銀二十八兩三錢八分在臨清往

返者每船給銀三十九兩三錢五分有奇共四百十有九船應給銀萬四千九百四十二兩一錢有奇再在德州往返各船先經兩次借給每船共銀三十八兩今每船多給銀九兩六錢二分有奇共多給銀千三百五十六兩一錢六分免其扣追○十三年

諭湖南明歲應運漕糧已經截留為黔省振濟之用定例漕船停運之年給運軍一半月糧以為養贍朕思

各船水手均由運軍雇募多繫別省貧民今湖南漕運既停各水手等在異鄉乏業未免歸費無資著湖南巡撫於本年回空漕船抵次之日就近驗明各水手內有別處民人即量給盤費資助令回原籍勿令逗遛滋事欽此○乾隆三年奏準回空漕船舵水人等零星稍帶梨棗六十石免其輸稅○四年題準各省重運糧船例帶土宜百二十六石向因各項貨物粗細不同按石計算漫無一定嗣後

分別貨物粗細酌量捆束大小定數作石於過
淮處立榜曉諭如有違例裝載以及書役人等
稽延勒索嚴加究處○七年奏準安徽蘇松浙
江三省截留漕船於定例停給一半月糧項內
再照浙例減半賞給○又

諭今年漕船北上時值河水淺涸各船盤駁加絳繁
費實多借支庫項以作歸塗使用江西南昌等幫
借銀四千四百兩江南興武等幫借銀千七百四

兩揚州等幫借銀千七百九十二兩均著加恩賞給免其扣還欽此○十年奏準首進幫船每年五六月間回空之時尚無梨棗可帶以致不能均沾利澤嗣後回空糧船行至山東如無梨棗可帶準其將核桃瓜子柿餅等物攜帶六十石以抵梨棗之數倘逾六十石者按則徵收稅銀○

十一年

諭停運漕船例給一半月糧以資苦蓋上年兩江被

水朕降旨蠲緩並截留漕糧以備振卹之用其減
歇軍船自應照例支給但念該地方被災之後軍
力未免艱難一半月糧慮不敷用著加恩於常例
五分之一外增給二分俾窮軍不致拮据欽此○十

三年

諭本年四月初間湖南江西運船於桃源宿遷地方
遭風沉溺重船五十隻所有虧折米數例應運軍
買補其船亦應賠造但念窮軍力量艱難若令一

時賠補難免拮据著加恩軫卹其船已滿年限者照例給價成造未滿年限者於道庫內借給令其及早成造限以三年陸續還款以紓軍力至此次失風實非人力疎忽所致運官及汛地各官均著免其處分欽此

一徵收禁例順治九年題準運軍行糧應給本色有違例折銀者縣官與運弁皆嚴提究擬○十二年題準兵道知府職不司漕有借驗糧名

色苛索者官即指叅胥役究治○十三年奏準
漕糧開徵之時如有州縣蠹役包攬代完及飛
派無辜者即行指叅○十五年議準州縣拖欠
漕項錢糧該管監兌糧道等官嚴檄行催不得
差役致滋勒索違者指叅○又題準運軍子弟
及積年舊役有謀充有漕各衙門書承者令總
漕及督撫嚴察從重治罪如本官失於覺察及
徇庇容隱者分別叅處○十六年題準州縣徵

收漕米浮派雜費及僕役經承需索小民常例者嚴行禁止犯者題叅究治○康熙元年題準徵收糧米責成印官稽察不許顆粒囤貯私家如紳衿大戶仍囤私家不行交倉者管糧官詳報總漕題叅○四年題準各州縣徵收漕米如有淋尖踢斛剗削斛底改換斛面及別取樣米並斛面餘米者總漕各督撫嚴察題叅○三十年題準州縣官侵隱漕項銀捏稱民欠冒請蠲

除者題叅治罪其失察之該管上司交部議處

○又題準州縣經承盜賣漕糧依律治罪失察之本管官照例議處○三十三年題準漕糧耗米例應徵收本色給軍如有私自改徵折色者各該督撫題叅照私折漕糧例議處○五十一年題準州縣兌糧責令監兌官坐守糧道親到水次稽察倘有折收情弊發覺將該管州縣及領運官皆革職監兌官降二級調用糧道降二

級留任所折之米照數追賠

一重運禁例順治五年題準運官奉單領運赴次違限者革職戴罪交糧覈其完欠奏奪僉運退避者嚴拏究擬○十年題準領運弁軍中塗侵盜漕糧按律治罪所欠漕米照數嚴催追賠

○十二年題準衛軍水次承運有衛官隨幫官常例書識管家抽豐名色州縣官知府同知通判及糧道漕院各衙門吏胥班役勒索陋規並

過淮攤派使費沿塗需索土儀及抵通過壩交
倉船規常例倉場坐糧廳書吏苛索使費飭令
各該衙門盡行禁革在外責成總漕總河各該
督撫在內責成倉場侍郎巡倉科道協同釐剔
倘有前項弊端立即題叅究處以肅漕政○又
題準監兌漕糧事竣之日監兌官將有無需索
等弊具結投送督撫存驗事發以溺職坐罪○
十三年題準水次將米折銀罪在經徵有司並

監兌官如過淮盤驗短少將監兌官照例叅處
其嚴禁盜賣令沿河各官具結呈報如糧船到
通挂欠審繫某地方盜賣者即將該地方官叅
處賠補○十五年題準運弁領運漕船各有定
數如中塗歸并帶運冒支行月水脚等銀按照
闕船數目嚴追從重究處○康熙二年奏準運
船交兌之初專責糧道曉諭商牙禁約運軍不
許夾帶私貨漕糧兌畢未開之先專責監兌官

逐船搜檢糧道隨取監兌官察明並無夾帶甘
結送總漕總河倉場侍郎三處稽考如有犯者
拏解糧道呈報總漕題叅照律治罪○又題準
沿塗城市鎮店貨物輻輳之所專責押運通判
極力催行不許停泊通幫前後不時稽察如稽
察不嚴即將通判題叅照例議處○又題準運
軍已攬客貨私載船內運官隨幫官嚴加稽察
許於司漕衙門據實出首免罪如隱匿不報一

經察出運官隨幫官加倍究擬運軍依律治罪
○又議準糧船經由地方自水次至淮安總漕
同淮揚道盤詰一次至濟寧總河同濟寧道盤
詰一次○三年題準官軍赴兌漕糧爭索斛面
酒席耻辱糧官者運官以故縱議處運軍竢船
糧抵通之日嚴行究治○五年題準運弁侵蝕
各軍月糧銀米竢抵通交盤之日倉場嚴審究
擬○又題準運軍多收斛面入已並運官知而

不舉皆從重擬罪勒索之米照追入官○又題
準領運官弁勒索運軍飯米擅扣行月公費等
銀及縱容親僕需索常例者竝抵通交糧完日
令倉場侍郎嚴提審追按律究擬○又題準舊
例弁軍爭告在未兌糧之先責令糧道嚴察不
許領運如在領運之後竝完糧回南日聽該衙
門審理嗣後有擅準運蠹呈辭拘繫新運幫官
稽誤新漕者照誤漕例議處運蠹嚴審究擬○

六年題準運弁自誤限期捏辭卸罪誣告官吏
糧里者依律擬杖○八年題準運弁領運全單
不填注支領糧銀月日照疎忽例議處○十一
年題準運弁私載客貨與已貨及裝載私鹽者
皆革職運軍私攬客貨私載已貨及裝載私鹽
運官失於覺察者降一級調用該管糧道不嚴
禁者罰俸一年○二十一年題準收兌漕糧多
攪糠粃砂土者該管官革職監兌官降一級調

用其抵通兌漕糧米多糠粃及有砂土者押
運官革職糧道降一級調用○二十五年題準
紅駁船分運漕米如有用石灰泡水及藥水灌
漲糧米者領運弁軍呈報倉場侍郎究審將運
船人夫發寧古塔等處兵丁為奴其短少之米
勒限著落正身船戶家產賠完如駁運米好弁
軍勒索不收亦交與刑部從重治罪○二十六
年題準沿途催漕將弁縱兵索詐漕船以致運

軍畏避船米撞沉者革職嚴拏究擬○二十七年題準運弁需索運軍未遂不顧風浪逼船渡江以致漂沒漕糧淹斃人口照例治罪追埋葬銀給死者之家漂沒漕米仍著落該弁賠補○二十八年題準運官縱軍捉船駁淺漫無約束者題叅照溺職例革職○二十九年題準運官縱令運軍搭臺演戲停泊不行貽誤漕運者照例革職○三十年題準運官不親運者將承委

衛備及押運通判等官交部議處○又題準押運官沿途耗費漕糧妄稱同押官折收者勒追全完仍照誣告律治罪○四十一年題準運軍沿途盜賣漕糧押運官并失覺察者各降一級調用○四十三年題準漕船重運入境責令沿河該管道府州往來巡察嚴緝盜賣如失察盜賣一起者州縣官罰俸六月道府罰俸三月四五起以上者州縣官降一級調用道府降一級

留任若道府州縣能察實拏獲將賣糧買糧之人各枷一月示衆滿日責三十板糧米追交本船米價入官充餉運弁竢回南聽總漕捆打四十○四十八年題準各省漕船除帶運鋪墊倉廩楞木松板及每船土產貨物外如有民船雜於糧船幫內及將駁船竟造大船夾帶私貨並船上堆置木植船尾拴縛木筏過關又違例多載私貨者總漕總河及糧道嚴察將該運弁題

叅治罪○五十一年奏準每幫十船令各軍連
環保結互相稽察如有折收盜賣等弊事發之
日本軍照例治罪其餘九軍一同責懲○五十
七年題準浙江幫船令分夾江南幫內湖廣幫
船分夾江西幫內使彼此勢孤力薄免致爭鬪
○五十八年奏準江西湖廣糧船該督撫責令
糧道押運等官並地方文武官於上流漢口英
城集貨馬頭嚴加察禁不許商民貨物私上糧

船亦不許運軍包攬私貨取具糧道押運等官
弁並地方官甘結報明總漕如違例私帶過淮
盤糧時察出貨物照例入官軍商皆從重治罪
糧道及押運等官皆嚴加議處○雍正元年覆
準運弁管押重運擅自離幫及本軍在南挽託
別軍包運並隨幫與副軍不親在幫押空以致
遺棄漕船有誤新運者將弁軍從重治罪糧道
指名題叅○又題準失風船到壩舊例驗其米

色不堪起卸者準其賣銀買補嗣後如有不肖
運軍乘機夾帶好米私行盜賣者令倉場坐糧
廳不時巡察究治若在南串通州縣倉役將米
折銀或將原米盜賣掩飾過淮故買爛米充數
者令總漕密加訪察將弁軍胥役從重究處該
管官題叅○又題準漕糧不許顆粒上岸如遇
過淺加夫止許照常給錢不得任意索米違者
以盜賣盜買從重治罪地方官照失察偷盜例

題叅○二年

諭朕惟漕運關繫甚大經費本無不敷運軍恣行不法
皆由官弁駁削所致如開兌之時糧道發給錢糧任
意扣剋運軍所得十止八九而僉軍之都司監兌之
通判又多誅求及至開行沿塗武弁借催趲為名百
計需索又過淮盤察私貨徒滋擾累究屬無益運軍
浮費既多力不能支因而盜賣漕糧偷竊為非無所
不至矣嗣後各省糧道給發錢糧不許扣剋分釐沿

塗武弁不許借端需索運軍除包攬抗違外所帶些
湏貨物亦無容苛刻盤察爾部行文各督撫不時稽
察如有仍前需索等弊立即指叅從重治罪欽此○

三年題準運軍南北往返必須食鹽每船準於
受兌上船處帶鹽四十斤交卸回空處帶鹽四
十斤此外多帶者同私鹽治罪○又題準糧船
攜帶火礮烏槍一經察出本犯照私藏烏槍例
處治糧道衛守備運弁照失察例叅處○四年

題準領運弁軍不諳漕務封閉倉門以致倉米霉變弁軍按律究擬虧折漕米勒限著落運軍賠補不完從重治罪○又題準運弁兌漕勒索各屬經承者斥革究擬所得銀物追取入官○五年題準漕米到淮盤驗潮濕霉變將經徵州縣官照例革職監兌官照溺職例議處糧道不先揭叅照徇庇例議處運弁涵行收兌照例革職留任竢船糧抵通令倉場侍郎按數稽察如

有虧折勒限賠補限內不完題叅革任追賠○
六年奏準運軍用水攪和漕糧運弁徇隱不報
者革職枷示河岸竝漕竣日釋放運軍用大枷
枷示漕竣日僉妻發黑龍江給兵丁為奴押運
官弁漫無覺察照例革職○八年題準漕船到
淮向有給管糧經承津貼飯食陋規嗣後定例
大幫給銀六兩小幫四兩呈繳給發不許私相
授受違者提究重處○又題準漕船到淮飭各

幫字識繕造米數軍舵姓名等冊不許總漕冊
房攬造科派使費犯者嚴加究治○又題準江
浙糧艘由鎮江出口方豎篷桅舊例委催漕官
就便察看不免需索嗣後俟過淮時總漕親加
點驗至各省糧船總滙於揚州之三汊河例委
幹員彈壓分幫如委官及跟隨人役需索盤費
一例叅究○又題準漕船渡黃汎并不顧風色
水勢妄行催趲借端需索者照失於防範例議

處致有疎虞加倍治罪○又題準漕船渡黃河
後提溜打牐向有弁兵串同人夫勒索運軍倍
出工價陋規應於重運北上時責令委駐營將
約束禁止倘有縱容徇庇一并會叅議處○又
題準漕船應領修脣銀例應照數給發運軍有
需索使費陋規致運軍以朽腐船撞觸民船借
端索詐者即將該幫弁軍究處○又題準運軍
攬載客貨船重難行強奪民船駁載糧米者照

水手搶奪例治罪其攬貨私得稅銀並商民通
同聽攬者皆照違制例治罪○又題準正副二
軍赴次交兌如有革軍衿監攬身入幫即拏交
地方官究治若運軍不察拏一并究治○十年
覆準淮安府乃各省糧艘總匯之區一應陋規
久經裁革恐日久生弊照通州石土二壩建碑
之例於盤糧廳後立碑一座將裁革陋規刻石
永遠遵行○十一年奏準各省漕船不許裝運

無引私茶如違禁攜帶於過關時察出即照私鹽例治罪○乾隆元年奏準糧船夾帶私鹽多由土豪豫買私鹽窩囤河干勾通售買嗣後天津地方令巡漕御史會運使實力緝拏其沿河地方令各督撫提鎮嚴飭沿河文武官弁凡糧船經過時差兵役實力稽察如有水手人等私帶貨賣以及土豪豫買窩囤情弊一面嚴拏按律究治一面催船前進勿得留難誤漕倘徇縱

失察一經發覺將督運押運官弁以及前塗失
察之地方官弁並失察豪強之地方州縣皆照
例叅處其鹽除留食鹽外餘皆入官○三年奏
準運軍盜賣漕糧頭舵工不舉照不應重律治
罪受財者計贓從重論○又奏準重運入境道
府州縣往來巡察如失察盜賣者照例議處其
武職催漕向未有失察處分未免漫不經心嗣
後沿河營弁失察盜賣漕糧當汎干把照州縣

例議處兼轄游守照道府例議處如嵩汎干把
及文職州縣一年內能拏獲二次者紀錄一次
兼轄游守及文職道府一年內於所管內拏獲
至四次者紀錄一次再有多獲照此遞加至汎
兵疎縱失察者革役照不應重律杖八十知情
賄縱者計贓以枉法從重論若能拏獲報官審
實將米仍歸本船其應入官之米價追賞兵丁
○又奏準小船受雇裝載盜賣漕糧拏獲之日

不得諉以不知照賣糧買糧枷責例減二等發落○又奏準盜賣漕糧定例賣買之人枷一月責三十板糧交本船價追入官至運軍食米向無禁賣之條有將漕糧舂熟假稱食米盜賣者嗣後運軍多餘食米於抵通交米之後方準變賣如重運漕船沿途賣米不論糙熟皆照漕糧治罪○又奏準運軍不拘回空重運如有無故潛逃棄船中塗不顧者照守禦官軍在逃律治

罪外仍於面上刺逃丁二字示儆○四年奏準
如有重運盜賣漕米回空之船代為承認者該
管官嚴加稽察察出將賣買軍民一并照例治
罪○又奏準失察盜賣漕米合算米數不在五
十石者仍照失察次數處分其失察一二次米
數至五十石以上者將該地方官降一級留任
道府等官罰俸一年失察一起至三起合算米
數至百石以上者地方官降一級調用道府等

官降一級留任○又奏準各省受兌開兌之時
令總漕密加察訪如押運官弁以及糧道等衙
門吏役有科斂陋規幫規之弊即嚴叅究處並
飭該管官不時嚴察有陽奉陰違者將與受之
官軍等照例詳揭倘該管官徇隱不揭報一并
題叅○五年題準江廣等幫漕船多帶土產竹
木沿塗貨賣其竹木於天蓬上裝載毋得過高
二尺如有違例多裝令押運官弁勒令起卸嚴

加責懲竹木入官如官弁通同徇隱照例叅處
○六年奏準糧道催米催船督押催船凡差役
滋擾之弊定例皆經禁革惟豫省提幫出運時
先發一牌繼差一役齎票前至衛所提催不無
假威滋擾嗣後嚴行禁革並飭各省一例遵行
如有陽奉陰違指名叅處○八年題準漕船如
有失風事故以致米色黴黯不純驗明米色稍
減尚屬堅實可以久貯者交倉受收其所減成

色米責丁賠補於次年搭運抵通交納

一回空禁例順治十六年題準押空官串通運
軍盜賣漕船提究追賠買主從重懲處○康熙
五十一年題準糧船回空至德州桑園地方總
漕選委能員協同德州衛弁搜索私鹽並飭地
方文武官弁嚴拏窩囤如有夾帶私鹽事發將
專委漕員德州衛弁押運官弁並該地方官題
叅嚴加議處○雍正元年奏準回空船過天津

關長蘆巡鹽御史會同天津鎮總兵官親往驗
放至山東河南交界地方總漕巡撫鎮將差委
知府游擊等官搜檢如有夾帶私鹽盡拋入河
失察各官照例議處○二年題準回空糧船夾
帶私鹽不服盤察持械拒捕者分別十人上下
及傷人不傷人各按首從依律治罪其雖無私
鹽但闖關闖牘者亦分別首從依律治罪若未
闖關牘但夾帶私鹽者照販私律加一等治罪

○又題準糧船夾帶私鹽將販私地方之專管
官降三級調用兼轄官降一級罰俸一年押空
之運官照徇庇例議處隨幫革退其恃衆闖關
闖牆及犯私拒捕傷人者押運等官革職隨幫
照例責革○三年題準糧船回空凡經由產鹽
處所地方文武官弁晝夜催行前進不許逗遛
並嚴拏囤戶串通運軍販賣私鹽該管鹽務運
司等官巡察各場竈不許夾帶餘鹽出場如有

徇隱疎縱者叅處○又題準回空糧船至揚州府儀徵縣向例總漕委官協同揚儀營汛並地方官搜檢嗣後改於瓜洲江口令瓜洲營協會同江防同知搜檢如有私鹽事發究明場竈地方並裝運上船日期將各該地方官失察職名題叅○又題準押運官弁一年之內該管幫船並無私鹽事故準予紀錄一次隨幫能拏獲首明私鹽三次及該幫三次回空並無私鹽事故

者該管上司出具印結咨部以干總推用○四年題準漕船抵通完糧回日所餘行月等米舊例聽其沿塗買賣嗣後全糧過壩之幫遇有剩米必赴坐糧廳批照然後準賣若未經給照擅行私賣私買者照例議處○十年奏準回空糧船過山東時該撫豫於晉省私黃入境之處令地方官弁分路巡察本省焰硝亦實力稽察毋許囤戶偷販河干暗送入船並令搜檢私鹽之

文武官帶檢硝黃如察出私帶硝黃亦照私鹽
例究明叅處押運官弁失察照糧船夾帶私鹽
例議處○乾隆元年奏準漕船回空押運官弁
多不隨船南下頭舵水手人等往往欺壓行船
嗣後如遇回空糧船行兇爭鬪藉端將來往行
船阻留相毆商民等事許沿河汛弁察明情由
及幫次船號運軍姓名一面速令遙行一面詳
報總河咨明總漕究治○又題準回空軍船應

帶食米燒煤向無定數嗣後江西省每船準留
食米四十五石燒煤四十石湖南省每船準留
食米三十六石燒煤三十二石湖北省每船準
留食米三十三石七斗五升燒煤三十石江浙
每船準留食米三十石燒煤二十五石自通州
至宿遷淮揚等處逐關察驗扣除免稅放行不
得越數多帶巡役人等亦不得勒索留難○六
年奏準押空隨幫一年之內並無私鹽事故者

準其於補官日紀錄一次○七年奏準薊運回
空行令直督轉飭薊州文武官弁俟糧船抵薊
卸糧之後即催回空不許在該地方創取白土
裝載上船並令出示曉諭沿河各市鎮鋪戶人
等不許將白土賣與糧船致滋攪和情弊嗣後
如經關口汛地察出薊運回空帶有白土並兵
役人等遇有糧船偷買白土拏獲審出實情將
該運弁與押空千總皆照運軍攪和水米運官

不行稽察例革職其該船軍舵照運軍使水攬
和發遣例減一等杖一百徒三年偷賣白土之
軍舵同罪將白土攬入漕糧至百石以上者即
照攬和水米例發遣黑龍江與兵丁為奴知情
收買收賣之舖戶照違制例杖一百仍枷一月
發落並不行察禁之薊州文武官弁皆照出洋
商船私帶軍器地方官不嚴行禁止例罰俸一
年○十四年題準天津阿城淮安儀徵等處產

鹽之鄉貧難老幼一遇漕船經過充塞河干負
鹽售賣令督撫轉飭地方營汛官弁嚴行稽察
毋許老幼男婦隨船貨賣其舵工水手應需食
鹽只許向官舖售買每船總不許出定例四十
斤之外如多帶私鹽即嚴拏究治若不實力稽
察照例議處

一漕糧雜禁順治十四年題準領運弁軍如有
借端擾害過往官商船及恣橫生事者督撫鎮

道等官嚴拏照營兵鼓譟例先從重懲治一面
題叅送刑部究處○康熙元年

諭糧船經由漕河領運官軍依限抵通回空方為盡職
無罪乃有等姦頑官役不守成法多有夾帶私放貨
物隱匿犯法人口倚勢恃力行兇害人借名阻礙河
道毆打平人託言搜尋失物搶刦民船且有盜賣漕
糧中塗故致船壞以圖貽累地方種種姦惡督漕各
官並該地方官一有見聞即行叅奏務將官員嚴提

治以重罪若知而徇隱不奏亦從重處治欽此○六
十一年題準糧船頭舵水手有砍伐官柳折毀
緯橋拔椿掘埽者嚴提治罪估價追賠押運官
弁及地方文武各官并加叅處○又題準水手
夥衆搶奪十人以上執持器械者首犯照強盜
律治罪為從減一等十人以下無器械者照搶
奪律治罪出結之運軍及頭工舵工容隱不首
照強盜窩主律分別治罪○又題準押運領運

各官弁例應嚴押漕船毋許運軍舵工水手登岸生事如有不法即會同地方催糧各官協拏究治倘平時漫不約束臨時又復容隱者總漕指名題叅照例革職○雍正元年

諭江南浙江江西湖廣山東河南各省總督巡撫漕船關繫緊要除本船正副運軍外其頭舵工水手皆應擇用本軍庶各知守法不敢誤漕生事近聞多雇募無籍之徒朋比為姦不服運軍彈壓當漕糧兌足之

後仍揆延時日包攬貨物以致載重稽遲易於阻淺不能如期抵通及回空經產鹽之地又串通姦頑收帶私鹽此其弊端之彰著者聞尤有不法之事凡各省漕船水手多崇尚邪教聚衆行兇一呼百應邇年以來或因爭鬪傷害多人或行劫鹽店搶奪居民種種克惡漸不可長亟宜懲治爾該督撫即嚴飭所屬各衛所嗣後糧船務於本軍內擇其能撐駕者充當頭舵工水手不許雇募無籍之人更嚴禁邪教諭令

歸業務為良民如仍怙惡不悛該地方官不時察拏
從重治罪如奉行不力即將該管官弁指名題叅欽
此○五年題準姦徒專放糧船私債舊例許運
官並運軍自首照私放官債加等治罪嗣後有
違禁取利盤剝運軍者責令地方文武各官及
坐糧廳立拏究治如地方官坐糧廳不即嚴拏
及該管運弁縱軍私自借債者一經發覺皆交
部嚴加議處○十年覆準漕船損壞皆因運河

水道舊堤遺址積年淘卸衝激日就窪下舊存
石塊木椿淹沒水底糧船過此一經抵觸多致
損壞應嚴飭沿河鎮道等官於水落之時沿塗
細看凡有阻礙悉行起除倘起除不淨抵觸漕
船總漕並巡漕御史將該管河道等官題叅議
處○十三年

諭朕聞南方濱江兩岸多繫蘆洲民間將蘆葦堆貯洲
上賣以度日而江楚及上江各幫漕船由江經回竟

有不法水手每遇蘆柴堆積之處輒糾集多人蜂擁
上岸恃強奪取洲民攔阻動輒毆詈甚至有強取雞
鴨等物者小民畏勢莫敢與較水手肆行如此運弁
即坐本幫糧船之內安得推為不知至督運之糧道
押運之府佐雖云統轄衆幫亦當留心稽察何得任
其多事著漕運總督通行曉諭倘有仍蹈前轍者經
朕訪聞必將大小文武運官分別嚴加議處欽此○
乾隆元年覆準糧船水手遇有事犯如已經離

船以及未經上船之先者不得拖累運軍如有
棄差逃走者令在押運通判處十日一次呈報
○四年奏準催漕弁兵需索運軍銀錢土物者
經該管上司及巡漕御史察出繫兵將該管干
把照失察衙役犯贓例議處繫汎弁將該管上
司照不揭報劣員例分別議處需索之弁兵計
贓以枉法論土宜禮物照挾勢豪強之人接受
所部餽送土宜禮物受者笞四十與者減一等

律分別治罪贓物給還如兵弁需索運軍或運
軍行賄而押運官不即申報照應申報上司而
不申報例處分如知情故縱照以財行求律受
財者與以財行求之運軍一同治罪追贓入官
如運軍被索即時首告免罪追贓給主其贓少
首多或因催行挾私誣首照誣告律分別治罪
如不行首告仍照以財行求律與受同科贓物
入官催漕弁兵遇有運軍行賄據實盡首免其

治罪追贓入官運軍照以財行求律治罪○五年覆準糧船沿塗提溜趕幫雇用短絳每夫每里給制錢一文打牖每船用夫一名給制錢一文如牖壩水急難過夫役守候臨時酌增催漕兵役毋得借端需索至各夫雇價給與見錢毋得以貨抵給如有兵役夫頭派加短絳多索夫價從中取利貽害運軍者照霸占損擡分外多取雇直不容本家雇人者枷兩月杖一百例治

罪該管官弁自行察出懲究者免其叅處如漫
無覺察照失察衙役犯贓例議處其扶同徇隱
者照縱役犯贓例革職○又奏準各幫頭船運
軍有借沿塗使費名色科派各船包攬侵蝕之
弊應專責運弁稽察如運弁串通頭船運軍科
派各船者照因公科斂律杖六十贓重者坐贓
論若分肥入己者計贓以枉法論如運弁知情
徇庇者照縱容衙役犯贓例革職其失於覺察

者照失察衙役例分別議處○七年奏準漕規諸弊均有嚴禁之例惟恐日久弛玩刊刻木榜列於瓜洲牐口儀徵江口淮安之盤糧廳濟寧臨清天津通州各口俾往來弁兵觸目警心仍令該管官不時稽察如有干犯照例提叅究處○八年奏準運軍正身不押運者將承派運軍之衛守備罰俸一年領運守干徇私不稽察者降一級留任惟隨幫武舉向無責成嗣後領運

官弁徇私縱容代運隨幫知而不報者照應申
上而不申上律議處

一倉漕奏銷順治十二年題準輕齋由牘席片
板竹行月等項一應隨漕錢糧經管各官逐款
備造舊管新收開除實在清冊在糧道者總漕
按年奏銷在坐糧廳大通橋者總督倉場侍郎
按年奏銷○又題準漕糧徵兌總漕派發全單
取造軍衛有司額漕數目報部如有未完即行

指叅○康熙二年題準輕齋席片松板楞木本
折錢糧出運減存行月銀糧漕贈銀米過湖淺
船倉米副米並修造漕船淺貢運官廩工民七
料價六升米折及蘇松常鎮四府協濟壽淮揚
鎮等倉米麥銀此等漕項錢糧均取在地畝銀
米內支用備辦舊例各作分數考成嗣後總作
十分總漕每年造冊奏銷○十五年題準江南
江淮興武等幫水手銀總歸江安糧道催徵給

發造冊呈送巡撫奏銷○又奏準江寧衛本折
行月總歸江安糧道管理○十八年題準德州
倉額徵本折米麥歸并糧道專管報銷○二十
三年奏準奏銷冊籍將支用款項總撒數目分
晰開造如有款項不符溷行造冊題報該管督
撫照朦溷例處分○二十四年題準臨清倉應
徵米麥各屬相距甚遠解送維難應準其折徵
解倉支給報銷○二十六年奏準存留項下錢

糧在本省支用並支剩者不作分數隨起運數
內造冊奏銷○二十七年題準江南減存行月
廩工備料小料等項銀照江西湖廣之例停其
解淮徑解江安蘇松糧道歸入漕項奏銷案內
題報○二十九年題準河南額解臨清德州二
倉錢糧歸驛鹽道兼理其奏銷考成該撫於年
終具題○三十一年題準德州倉奏銷考成於
次年五月內依限奏銷○三十二年題準蘇松

所屬州縣額徵加漕裁扣六升等銀原繫供支
蘇松漕糧運軍行月之需舊例解交江安糧道
給發報銷今酌定解交蘇松糧道總作完欠支
給奏銷○又覆準嗣後淮安徐州鳳陽等三倉
徵收米麥豆各州縣離倉路遠往返盤駁官民
受累應照漕折定例折徵竟解糧道支給○三
十五年題準各省漕項錢糧向繫總漕隔年奏
銷嗣後應照地丁錢糧之例於次年五月奏銷

但漕糧十月開徵至次年九月方滿與地丁不
同嗣後仍照舊例隔年三月奏銷○又題準臨
德江寧淮徐鳳陽等倉編徵行月銀及米麥原
為供支運軍廩糧之需江寧德州二倉統入漕
項奏銷其臨清倉月糧淮徐鳳三倉行月錢糧
總漕照例於隔年三月別案題銷○六十年題
準奏銷本年錢糧將上年存剩錢糧作為舊管
本年已完錢糧作為新收仍將舊管收除別造

簡明清冊送部○雍正七年題準漕白二糧奏
銷及通濟庫錢糧奏銷向未定有限期今酌定
於次年五月內造冊具題○十一年題準江寧
淮安徐州鳳陽四倉錢糧奏銷考成舊例該管
督撫於次年五月具題今展限一月江寧淮安
鳳陽三倉均於次年六月內題報徐州一倉江
督仍照原限奏銷○十二年奏準漕項奏銷部
覆駁問數項向例扣限四月按款咨覆未完錢

糧扣滿年限咨叅雍正十年部議將漕項登答
改為一年一次具題未完銀內續完數目令其
歲終彙報並造入下次奏銷新收春秋季冊之
內案牘紛繁彼此牽溷反難察覆應仍照舊例
其節年未完錢糧續完若干仍未完若干並動
用存貯各數該省分別造冊別繕題本隨本年
奏銷一并題報

一漕糧考成順治十三年題準各省漕糧經徵

州縣衛所各官初叅未完不及一分者免議一
分以上罰俸六月二分以上佳俸三分以上降
二級四分以上降三級五分六分以上革職並
戴罪督催完日開復○又定例州縣衛所各官
叅後漕糧違限不完者加倍議處應罰俸者佳
俸應佳俸者降二級應降二級者降四級應降
三級者革職戴罪督催完日開復應革職戴罪
者實降二級調用○十八年題準州縣各官初

叅淮徐等六倉糧銀未完不及一分者停其升
轉一分罰俸六月二分罰俸一年三分降俸一
級四分降俸二級五分降職一級六分降職二
級七分降職三級八分降職四級以上皆戴罪
徵收停其升轉完日開復九分十分革職布政
使知府直隸州知州初叅各倉糧銀未完不及
一分者停其升轉一分罰俸三月二分罰俸六
月三分罰俸一年四分降俸一級五分降俸二

級六分降職一級七分降職二級八分降職三級九分降職四級以上皆戴罪督催停其升轉完日開復十分革職巡撫初叅各倉糧銀未完不及一分者停其升轉一分二分罰俸三月三分罰俸六月四分罰俸一年五分降俸一級六分降俸二級七分降職一級八分以上降職二級皆戴罪督催停其升轉完日開復署印官初叅各倉糧銀未完不及一分者停升一分二分

罰俸三月三分四分罰俸六月五分六分罰俸
九月七分八分罰俸一年九分十分降一級調
用不及一月者免議州縣各官叅後各倉糧銀
限一年內全完如限內不能全完原叅不及一
分者罰俸一年一分二分降三級調用三分四
分降四級調用五分六分降五級調用七分八
分革職布政使糧道知府直隸州知州叅後各
倉糧銀限年半全完如限內不能全完皆照州

縣官例處分巡撫叅後各倉糧銀限二年內全完如限內不能全完原叅不及一分者罰俸一年一分二分降二級調用三分四分降三級調用五分六分降四級調用七分八分降五級調用九分十分革職○康熙二年題準見年額徵漕項錢糧或一官經管或數官經管總作十分計算不必各作十分接徵接催之官皆照經徵督催例議處○又題準漕項倉項錢糧叅後各

立年限州縣各官限一年糧道知府限一年有
半巡撫限二年催追全完不完不復作分數皆
照原叅分數處分○又定各省糧道不必分別
正官署官功罪皆一例行○又題準臨德江寧
淮徐鳳陽等倉銀糧經徵督催官與隨漕項下
錢糧各作十分考成○又題準巡撫等官催徵
錢糧叅後年限已滿該撫將自欠原叅分數及
糧道等官分數不於叅本聲明察出照原叅分

數加等治罪○又題準各省隨漕輕齎等項錢糧經徽州縣衛所各官初叅未完不及一分者停其升轉罰俸一年一分降職一級二分降職二級三分降職三級四分降職四級皆戴罪徵收五分以上革職督催糧道知府各官初叅未完不及一分者停其升轉罰俸六月一分罰俸一年二分降職一級三分降職二級四分降職三級五分降職四級皆戴罪督催六分以上革

職巡撫初叅未完一分二分者罰俸三月三分
罰俸六月四分罰俸一年五分降俸一級六分
降俸二級七分降職一級八分降職二級皆戴
罪督催完日開復州縣衛所各官隨漕輕齎等
項錢糧叅後年限內不能全完原叅不及一分
者降一級調用一分降三級調用二分降四級
調用三分降五級調用四分以上革職巡撫糧
道知府等官叅後年限內不能全完原叅不及

一分者降一級仍戴罪督催其餘均依州縣例處分署任各官未完不及一分者罰俸三月一分罰俸六月二分罰俸九月三分罰俸一年四分五分降一級調用六分七分降二級調用八分以上革職不及一月免議○又題準山東糧道專管漕糧自開兌開幫以及抵通交倉皆親身尾押臨德二倉改折徵銀免其考成○八年題準向例各省巡撫經管漕糧完欠均照糧道

例議敘議處嗣後停止議敘如有未完仍照糧
道例處分○十年題準督催糧道知府等官初
叅未完不及一分免議一分以上罰俸三月二
分以上罰俸六月三分以上住俸四分以上降
二級五分以上降三級六分以上革職皆戴罪
督催完日開復糧道知府等官叅後漕糧違限
不完加倍議處應罰俸三月者罰俸六月應罰
俸六月者住俸應住俸者降二級應降二級者

降四級應降三級者革職戴罪督催完日開復
應革職戴罪者實降二級調用其署印各官未
完漕糧照雜項錢糧署印官未完例議處一分
二分罰俸三月三分四分罰俸六月五分六分
罰俸九月七分八分罰俸一年九分十分降一
級調用不及一月者免議○十四年題準漕糧
改折銀與隨漕項下錢糧各作分數題叅○又
題準州縣衛所官原叅不及一分年限內不完

者降一級留任再限一年內催完如又不完照所降一級調用○又題準署印官初叅各倉銀糧在任不久其欠不及一分者毋庸停升○乾隆五年議準浙江漕項奏銷本折月糧廩工永減淺貢等款列為一冊漕截灰石等款列為一冊輕齎行折等款列為一冊其向附月廩等款冊內之本色月糧一款改入輕齎行折冊內統算考成○又題準道庫州縣應解應給銀米任

意遲延或移催衛幫不即支領即於各本案內將道縣衛遲延職名確察附叅○七年奏準漕白二糧未完各官初叅二叅考成均照隨漕輕齎等項錢糧分別議處

一白糧考成順治十一年題準白糧與由牘銀總屬正項其完欠分數應以銀米總計合算如有未完照例議處○康熙六年題準經徵督催白糧各官完欠考成照題定漕糧考成例議處

其交兌過淮抵通限期以及議敘議處條例皆
照漕糧例處分○十七年題準白糧改折經費
銀原繫白糧項下應徵之款與白糧一例考成
○三十三年題準白糧項下減存經費銀乃解
部之項如不豫行詳請擅自動用將擅動之官
題叅著令賠完

一倉庫盤察康熙六年題準漕項錢糧乃輓運
急需司府州縣等官如將徵完之銀那動給發

別項支用者糧道詳報總漕題叅○二十八年
題準各省糧道存貯錢糧於年終及離任之日
責成藩司親身盤察出結如有虧空立即揭報
該撫題叅○雍正四年議準道庫實在錢糧自
雍正五年為始照司庫例每年春秋二季造冊
報部聽候撥解京餉○又題準江安蘇松江西
湖南湖北山東等省糧道衙門各增該庫大使
一人凡倉庫收放錢糧責成稽察其浙省道庫

即令布政使司理問兼管○六年題準江寧布政使司衙門徵收上下兩江應解南屯米麥豆舊有倉廩皆繫吏役經手支放今增設倉大使一人管理以專責成○十年題準德州原設常豐德州二倉臨清州原設臨清廣積常盈三倉年久坍廢應於臨清德州各增建新廩六座責成糧道督率臨德二州加謹蓋藏年終盤驗出其實貯印結送部並令常豐臨清二倉大使巡

察看守○十一年奏準各省道庫一應收支錢糧隨時知會藩司備案奏銷時將支銷存剩各款造冊移司盤察出結送部○又題準各省糧道新舊交代任內收支錢糧均照布政使司交盤例該管督撫造冊具題

一起運完欠順治五年題準漕欠無論多寡均發各糧道嚴追○九年奏準挂欠漕糧升軍發南追比承追各官嚴察本弁本軍產業估計變

賣盡數完糧不得聽其株連攀害○十二年題
準挂欠弁軍先在通州追比勒限一年如不能
完倉場題明發南追比再限一年追完○又題
準官欠追官軍欠追軍每年發淮追比之時分
別欠數研審明確官軍一例嚴追變產完賠如
運軍侵糧脫逃報明戶部行總督衙門提究追
擬○十四年題準運官到通糧米全完緣事呈
誤非貪贓失守大計隱匿逃人重罪該部酌量

分別以示鼓勵○十七年題準總漕以通漕論糧道以本省論凡欠二分者罰俸一年再運又欠一分者降一級調用欠二分者降二級調用欠三分者革職○又題準運官領運漕糧交納銷算買補以及隨幫代運全完者不準議敘○康熙元年題準搭解舊欠漕糧復有挂欠倉場開列分數題叅照例處分挂欠之米仍照數追賠○二年題準總漕巡撫糧道如通漕及本省

衛所漕糧盡行開兌開幫北上運務一官經手者前官雖有事故離任功罪應歸前官後官免議其總漕有一二省巡撫糧道有一二衛所未經兌完開幫前官事故後官接管功罪應歸後官前官免議○八年題準糧船阻凍天津漕糧收受進倉非本年內全完至隔年始行運竣者糧道押運等官不準議敘○十年題準漕糧開兌過淮違限者其到通糧米雖已全完糧道等

官不準議敘○二十五年題準搭運欠舊米與
原欠米色不符者糧道知府罰俸一年領運千
總革職○四十三年議準運官挂欠漕米以通
幫糧米計算如挂欠不及一分者責二十革職
追比追完還職免罪不完杖一百革職一分責
三十革職追比追完免罪不完杖一百徒一年
二分責四十革職追比追完免罪不完杖一百
徒三年三分責六十革職追比追完免罪不完

發附近衛所充軍四分責八十革職追比追完
杖一百不完發邊遠衛所充軍五分責一百革
職追比追完徒一年不完者絞六分以上者斬
照例籍沒家產抵償○又議準運軍挂欠漕糧
以一船糧米計算如挂欠不及一分者責二十
革運追比追完免罪不完杖一百一分責三十
革運追比追完免罪不完杖一百徒一年二分
責四十革運追比追完免罪不完杖一百徒三

年三分責六十革運追比追完免罪不完發附
近衛所充軍四分責八十革運追比追完杖一
百不完發邊遠衛所充軍五分責一百革運追
比追完徒一年不完者絞六分以上者斬照例
籍沒家產妻子抵償○四十九年題準漕糧挂
欠皆由糧道監兌押運等官不親詣水次面同
兌足糧船抵淮總漕亦不嚴行盤察以致弁軍
任意折銀沿塗盜賣嗣後將挂欠不及一分至

六分之弁軍照例分別治罪其總漕糧道等官亦照例按所欠分數議處並將所欠漕糧算作十分分賠總漕半分糧道一分監兌官半分總押運官半分運官一分半僉丁衛所官半分運軍五分半按此分數令總漕等官於限內賠完不完總漕糧道各官交部議處運官運軍照例治罪仍將弁軍不能賠完之米著落總漕糧道等官賠償至挂欠糧米既總漕糧道令分賠全

完者應加倍議敘山東河南湖廣三省糧道改
為加升一級江南江北江西浙江三省糧道改
為加升二級總漕議敘之例於康熙八年停止
嗣後各省漕糧十分全完者仍將總漕照例加
升二級○又議準升軍挂欠漕糧承追督催等
官皆照經徵督催淮徐等倉糧銀例議處○五
十一年題準同幫運官連名互結如將赤貧之
軍出結僉運以致挂欠不能賠補將本軍應賠

五分半之內令互結各軍攤賠一分○又題準嗣後一幫挂欠府廳等官罰俸一年糧道罰俸半年幾幫挂欠照此遞加罰俸○又題準押運同知通判一次挂欠降一級留任二次降二級留任三次降三級調用○又題準押運同知通判一次無欠加一級二次無欠加二級三次無欠不論俸滿即升○又題準江浙積欠之幫一運全完其次挂欠之幫三運全完別幫五運全

完均準其即升○五十四年題準升軍挂欠嗣
後免其留通追比一年令倉場侍郎將欠糧運
軍拏交運官即行發南追賠挂欠之米限次年
搭運赴通交納如次年不搭運總漕照例題叅
○六十年題準欠糧運官有於倉場未題之先
已升任他職者革職發追俟完糧開復之日照
例補用○雍正元年題準領運千總一運全完
加銜一等二運全完加升二等三運全完毫無

事故者從優議敘即升其江浙積欠之幫仍照舊例二運全完準其即升○二年議準搭解舊欠漕米必以本色交兌搭運過淮之時總漕盤驗足數方許開行北上如有麥豆雜糧等項抵充漕欠或過淮之後用小船趕送者總漕察明題叅○三年題準欠糧運官倉場即咨兵部開闕缺限內全完題請開復別行補用○五年題準弁軍挂欠漕糧向照失風挂欠之例止收平

米免其曬颺折耗嗣後非失風而挂欠者照起
運之數搭運抵通○十三年奏準運弁領運漕
白船糧如有過淮違限而抵通全完者竢總漕
將原叅過淮違限題準開復之後始準議敘加
銜○乾隆二年奏準領運守千江浙等遠省一
二運準按運加銜三運全完議敘即升不得復
請加銜至三運以後再能全完仍準按運加銜
山東河南二省官弁一三五運全完均紀錄二

次二四運全完均加銜一等至六運全完方議敘即升亦不得重複加銜至六運以後均照前相聞紀錄加銜○又奏準重運効力武舉領運江浙等遠省每運全完準於補官日紀錄二次領運山東河南近省每運全完準於補官日紀錄一次三運運滿咨部注册推用○三年奏準各省糧船抵通起卸漕米如有不足向例準買別幫餘米抵補但各省收兌如果足數抵通何

致不敷嗣後如有不足即行叅處著賠不準買
補別幫餘米其各船運軍日用餘米坐糧廳給
與驗票準其售賣外其餘各色漕米票米一槩
不許買賣交與通永道通州知州實力稽察如
有不遵即行拏究倘稽察不力被倉場及御史
訪聞將該道該州題叅議處○四年題準山東
河南二省遞年輪運薊糧督運通判押運全完
照例議叙○五年題準輪運薊糧千總準照山

東河南近省運通全完之例議敘○八年題準
定例準以完糧議叙抵銷因公呈誤降級等案
原指該弁本運降級事故即以本運應得議叙
抵銷其一應罰俸案件不準將完糧議叙抵銷
乃該弁等竟有以應加之銜故意遲延豫防將
來呈誤降抵之計於例未協嗣後漕運各官因
公呈誤應降調者如本運議叙準其抵銷其前
運應加之銜槩不準抵○十八年議準武職加

銜既經刪除嗣後領運官議叙遠省者一運全完加一級二運全完加二級三運全完即升近省一運全完紀錄一次二運全完加一級三運五運與初運同四運與二運同六運全完即升所加之級準其隨帶

一漕船偶遭風火順治十五年題準漕糧改解兵米大江漂流準照漂沒糧數開銷○又題準糧船在江洋黃河漂流者地方官察明給有印

照總漕及各該撫覆勘明確據實具題準予豁免如無題報即於本軍名下追賠若本軍無力補完將本幫餘米簷羨扣抵務足原數○康熙二十一年題準大江黃河漂沒搶救者將搶獲米灑帶各船運送其漂沒米準予豁免若坐視不救該督題叅從重治罪○又題準漂流船糧令沿途催趲各官及汛地文武官親臨確勘各出保結取具運官結狀該督撫具題豁免如未

經漂沒船糧運糧官軍詐報漂沒並故將船放
失及雖漂沒損失不多乘機侵盜至六百石者
照律擬斬不及六百石者照律發邊衛永遠充
軍漕米照數賠補其沿途催趲各官及汎地文
武各官不親臨確勘遽出保結者並行革職該
督撫不嚴察確實遽行題豁後詐冒事露將具
題督撫降二級調用○又題準文武官凡遇漕
船沉溺不將情由升報者降一級調用○又題

準押運官弁巡察不謹以致失火燒燬漕船者
降一級調用地方官不行協救延燒別船者罰
俸一年○三十六年題準漕船失風沉溺船未
抵通而糧已搭運到通全完者坐糧廳呈報戶
部運軍領過行月錢糧免其追繳○四十二年
奉

旨洪澤湖水勢更甚於大江黃河之水其失風漂沒船
糧從寬豁免嗣後洪澤湖有漂沒船糧亦照大江黃

河漂沒之例議奏欽此○雍正元年題準漕船在內河失風將押運官弁照失於防範例罰俸一年仍取具押運官弁並地方文武官弁並無假捏印結送部倘有假捏情弊即將弁軍嚴加治罪出結官弁從重議處○又題準糧船在內河漂流者不準豁免將該幫進倉米免其曬颺以所剩曬颺折耗餘米抵補漂流之數如抵補不敷將該幫羨餘銀扣抵該幫不足將該衛羨餘銀

覈總扣除務足原額○四年議準失風漂流之
米除將本幫餘米抵補外下剩米限次年搭運
抵通正兌改兌均照平米收受仍免其曬颺折
耗之米以示軫卹○五年題準漕船入境地方
官不顧風色水勢催趲前進在內河致有疎虞
將該管地方官與押運官并皆照失於防範例
議處○又題準漕船在江洋黃河洪澤湖漂沒
片板粒米無存者準予豁免○六年題準領運

弁軍凡遇海洋大江黃河危險地方遭風漂沒
幸獲生全者照軍功保守在事有功之例官加
一級運軍照軍功一等傷例賞給其漂沒身故
者官不論銜級大小照軍功陣亡例皆以見在
職任分別準廕加贈給與祭葬銀運軍亦照軍
功陣亡例給與祭葬銀其無妻子親屬者照例
給銀該督撫提鎮委官致祭至船內頭舵水手
被淹身故者照軍功二等傷例賞給○十三年

議準海洋大江黃河及洞庭洪澤等湖領運升
軍被溺身故照軍功例賞卹贈廕其在內洋內
河及以停泊海口島嶼等處修造漕船雖屬奉
公差委與効力疆場者有間此等幸生之弁軍
應照軍功例減等官給與紀錄二次運軍人等
照二等傷例減半賞給其漂沒身故者官照陣
亡例各減一等分別廕贈減半給與祭葬銀運
軍亦照陣亡例減半給與祭葬銀無妻子親屬

收受者仍照例給銀二兩委官致祭再內洋等處遭風溺故之千總量減一等廕子弟一人以把總補用○十三年題準漕船經運五六年及未至五六年而有風火等事之失責令賠造經運七八年而有事故責令買補經運九年而有事故以及腐朽不堪者責令雇募均至十年限滿準其給價配造○乾隆三年題準漕糧內河失風漂流運軍賠累艱難應交茶果銀槩行免

交其糧已漂失臨倉買補無藉經紀車戶轉運者箇兒錢一並免交若船無破損米無虧闕到通轉運進倉者箇兒錢照舊交納○又題準假捏失風希圖挂欠者仍照例議處若汎水漲發猝不及防失風之船能庠救修脣抵通糧無虧折或買補全完者領押守千丞倅皆免議處仍照例議敘倘船非滿號不能庠救米有挂欠雖買補全完亦仍照例議處至地方文武官弁協

同庠救船糧均無虧者免其議處如不能協同
庠救以致漂流者仍照例處分○又題準押運
丞倅遇有幫船失風事故向例與領運守千一
例議處但丞倅統轄十餘幫較之守千專管一
幫者有間嗣後量為輕減原例罰俸三月者改
為一月罰俸六月者改為三月罰俸一年者改
為六月降一級留任者改為罰俸一年降一級
調用者改為降一級留任降二級調用者改為

降一級調用革職者改為降三級調用○四年題準糧船停泊處所他船失火該軍在船不即設法開放地方官不行星飛往救以致延燒者將火燬船責令官軍名下分賠造運○五年題準漕船遇有事故各失防職名照例開送如有應行免議之處於咨內聲明聽候吏兵二部察議○又題準副軍有在大江黃河被淹身故者照軍功二等傷例賞給○六年題準各省出運

船糧凡有失風漂流之米照例報部分別易換扣抵倘有徇隱捏報等弊照例題叅○七年議準糧船失風火燎其船不致被沉者無論已未過淮即令修固原船復載抵通如已被沉難岸者準雇民船載運隨幫過淮盤驗抵通倘過淮時未經雇募將米已分通幫帶運者不許中塗再雇民船裝運以杜盜賣攪和之端若過淮後失事或在黃河中流及該地方無民船雇募者

仍令先分通幫帶運開行一面前塗雇覓民船
裝運總著通幫衆丁出具互保各結抵通交納
稍有虧欠責令賠補○十四年議準漕船回次
雖交與地方官收管仍著隨幫官弁約束稽察
遇有風火事故即將該隨幫職名報叅如新運
千總既經接收幫船即將新運千總職名報叅
或漕船減存在次遇有事故隨運二弁均不能
兼顧即開收管之地方官職名報叅至押運同

知等官如遇回空到次後風火事故免其叅處



欽定大清會典則例卷四十三